



K a n o a n a

<i>Te Kamauri</i>	1
<i>Kaongora man NSC</i>	2
<i>Kaongora mai irou-</i>	3
<i>Taeka n reirei</i>	5
<i>Ana Tangira Te Uea</i>	7
<i>Te Maiu ae tabu</i>	9
<i>Nei Maria Tinan Te</i>	11

Te Kamauri



Kam na bane ni mauri n ana Tangira te Uea. Ti Kam na bane ni mauri n ana Tangira te Uea. Ti uaia ni karaba ao n neboa te Uea ibukin teimatoan ana kakawakin nakoira ni kabane riki ngkai E a tia ni kateirakea Emmanuera ni manga reita tibangana ae kakawaki ibukira ngaira ara taan wareware aika karineaki, ao ai tarira ma manera inanon ara charismatic iaon Kiribati, Nutiran, Biti ao n tabo nako ake kam mena iai.

N te bong aio ao ti bon rangin kaonaki n te kukurei ni butimaea aia toa akaanera (archangels feast day) ake teniman ba St Mikaere, St Kabiriera ao St Rabaere. E bia reke ontinakon Emmanuera n te bong naba aio ba ara karea ae mangori ma ni boiarara nakon te Atua ibukia ara akaanera ake e a tia n anganira te Atua ba taan kataniira ao taan buobuokiira inanon ara tai ni maeu ao ni waaki ikai iaon te aba.

E rangin kukurei Emmanuera n te tai aio n reita te Ekaretia iaon aba ao riki bon iaon abara ae Kiribati n celebrate ke ni bukamarua te bong ae kakawaki aio irouara ngaira te nati ni Katorika ao ai bon ngaira kaain te Charismatic ni kabane iaon Kiribati ao n taabo nako.

Ti kona ni kaoki ara ururring nakon nanon araia ara akaanera aikai. Nanon te ara ae Mikaere bon **“who is like God”** ba

antai ae kona n roota aron tamaroan ma mimitongin te Atua, ao e bobota iai tibangan St Mikaere ba oin tabena bon te tia buaka ni kaitara tatan ma ana koraki ni kabane. Nanon te ara ae Kabiriera bon **“God is my strength”** te Atua bon korakorau. E bon kaotaki iai maakan ma korakoran te Atua are e katanoataaki ba e ruo mai ikarawa nako aonnaba iroun natina are e kamaua aonnaba ma n tokanikai iaon te mate. Nanon te ara ae Rabaere bon **“God is my health”** aio are e bon kamoamoaki iai ana kamaeu te Atua rinanon Rabaere ngke e riinga matan Tobita are taman Tobia ao e toki naba iai matakiina.

E bia anganira Emmanuera nte tai aio noran ao kabouan ana tangira Te Uea nakoira n tatabemanira n taian rongorongo aika boou ao ake a tia ni manga barongaaki irouia kaain ana tiim Emmanuera ma kaain te NSC ao n raonaki iroun Fr Koru. E bia kaboauaki naba te reitaki ao tatangiraia ara akaanera aikai irouara ao ena rikirake onimakinia irouara ba ana raonira n taainako ni kaniira ma te Atua, ni kataniira n ara buaka nako ao ni buokira ni kabane n ara kainano ma ara bubuti nakon te Atua.

E kauringira naba Emmanuera ibukin te rongorongo ae kakawaki nakoia kaain te Charismatic i aonnaba ao iaon Kiribati, te theme ke te rongorongo ibukin te ririki aio bon **“Kakorakoran ao kabutanakoan uran te ai - SPREADING THE FIRE”** A teimatoa kaain te Charismatic iaon Kiribati ke KCCRS (Kiribati Catholic Charismatic Renewal Service) n reitanako kauramaakan te ai n uouotan te taeka ae raoiroi ao bon kabutan naba ana tangira Te Uea n taian makoro, kaawa ao iaan mwenga. E bia teimatoa ana kairiri ma ana kamarurung Te Tamnei ae Raoiroi nakoira ni kabane ba ena roko ueana ma ana tangira taabo ni kabane ao i aonnaba ni kabuta.

Bon ana tataro Emmanuera E na kabaroa iaomi ana karaoiroi te Atua inanon am tai wareware ao mani karekei tibangami aika a tamaroa ibukin irirakin ao maeuakinan Nanon te Atua n taai nako. Ana kakabaia Te Uea iaora ni kabane ma ara utu ntainako.

“N te bong aio ao ti bon rangin kaonaki n te kukurei ni butimaea aia toa akaanera (archangels feast day)”

Kiribati Catholic Charismatic Renewal Service

Ibukin am rongorongo, taiaaaka reitaki ma Uriam Timiti, Beneteta Raobati ao Kautoa Tonganibeia.

Phone: + 679 3385364
Fax: 555-555-5555
E-mail: timiti_u@usp.ac.fj;
bene_raobati@yahoo.com.au
kautoaj3tki@gmail.com



“E kaota kukureina Fr Koru n aron teTutia are e nakoraoi kanoana ao ai kanoan te botaki”

Kaongora man NSC

Ana Toa Te Tama Koru Tito, e kauringaki irouia kaain Charismatic iaon Tarawa

Teretia Ioane. Tia Mwane, NSC.

I muin ana bowi NSC are e a kamatoa iai karaoakin ana bong ni katabu Fr Koru ao a tibatibaki baeriti aika tenea n tibangaia i bukin karaoakin te Tutia ao ai kanoan te Maneaba are e a koro bukina n te bong ae te Tabati 19 June i main raoi ana bong ni katabu are 20 n June 2016 kioina ba e na kiba nako Nikunau n te bong are i muina are bon tain raoi ana bong ni katabu.

E moanaki kanoana man teTutia n te bakantaai 5 p.m ao e raba te Uea ba a rokoraai anene ma uaboki ao uakarea n teTutia ba a rangi n nakoraoi karaoaia ao anene n Tutia aika a tangiraai ni kairaki n te bai ni katangtang. E reitinako te kukurei i muin teTutia ni maneaban Santo loteba man 7.30 p.m – 10.30 pm n te baka n amarake, te kuaea ma maie ao ai uakeeke are e kairia Teaoraereke Baeriti. E kaukaki te botaki iroun Kautoa n te tataro ao are a anga naba aia maroro n taeka tabeua nakon Fr Koru n te tai naba aio bon banaia kain Betio mairoun Riwata Obetaia, banan Bikenibeu mairoun temanna Tebaiuea Biri-bo. E reke aia tai kain NSC ao ai Tibi Leaders ni katoka bai i aon Tamara Fr Koru ba e aonga n ae e reitanako te korakora ao te marurung ao riki ni bubuti karea mairoun Tamnei ae Raoiroi (TR) aika e kainnanoi Tamara n taai aikai i bukin karikirakean te Ekaretia.

E kaota kukureina Fr Koru n aron teTutia are e nakoraoi kanoana ao ai kanoan te botaki. Ao aikai tabeua kanoan ana maroro are e anga Tamara ae Rine. “Ara atatai ao ara onimaki bon ana bai n tangira te Uea . Ti na kataia n aki kakaea te kukurei n aonteaba ma ti na barua kukurein te Tamnei ae ioura. E kakawaki ba ti na tabeki baira ni karaba te Uea ni kanoan te Tutia ae e katauraaki raoi. Au tataro nakon te TR ba e na kaoni ngkami ni kabane mai tabon Kiribati nako tabona ba e bia weteai be te tia butimaea ana karea ma n nora kakawakin kauraan ana Raoi te TR nakoia Kiritian ni kabane. E kakawaki wewetean te TR ma ana karea ake ti aki inaomata iai. Ti bia riki ba taan kabaroa te karea mairoun te TR. E bia reke tibangau n ami karea ba N na kabongana ni muiokoau mairoun te Uea. Kataia kinaa kakawakin

reitan aia karea Kiritian ma te berebitero, reitan te Tama ao te tia Onimaki, ao e banin te Karea mairoun te TR are e tangiria n angan te Ekaretia. Bubuti n taai nako i bukin ana Nanoanga te Uea. Maiuakina te ikabarabure n taai nako i marenami. Tataro i bukin aia karea Taama ba kam na kanoaki iai irouia. Ti na boutoka te Ekaretia ao kam na bubuti ba kam na rikirake i nanon te Maiu ae e tabu, n rikirake inanon te Raoiroi ba ngkana kam rikirake ao ngai N na rikirake naba. Kam raba riki raou n au reirei n te moan rian, tia reirei Tebaiuea ao ngkami ni kabane. Kakauongo nakon nanon te Uea, kinaa ba tera ae tangiria te Uea mairoun-- “sign of the times” ao kataia teboakinna ba kam na ira nanona. Kam raba.”

I main baran te botaki ao e anga naba ana taeka Tia Babaire Taketei James i bukin taeka ni iraorao ao ni karabaraba i bukia baeriti aika tenea n noran nanoia are a tia ni kakoroi bukin taian babaire man te NSC i bukin ana Toa Fr Koru n te tai aio. E kaeaki raoi te tai are e na aki rangi ni banako te tai ao e bara te botaki 11 p.m.

Nikirakin Ana Tangira Te Uea iroun Te Beretenti ma ana utu n te State House

Taaketei James. Tia Babaire, NSC .

I mwin butimaeana ana bubuti KCCRS iroun Te Beretenti ba ana kawaria ni mwengana i Bairiki (State House) ike a kan nikira iai ana Tangira Te Uea nte tataro, ao n reitaki naba ma ngaia ao ana utu n te nebonebo nakon Te Uea imwin rineakina nakon te nakoia ae rangin kakawaki ibukin Kiribati, ao e a waakina ngkanne te katauraoi te NSC nte aro ae ena barongaaki raoi te mananga.

Tenibong i main te mwananga ao e a karaoaki Te Tutia iroun Fr Koru n aia tabo kain te Itoingaina I Teaoraereke. E irianaki ma te katoka bai n Tamnei i aon te Beretenti ma ana utu ao ai te kakorakora nakoia kain te tiim ake a tia n rineaki kaaina ba a na mwananga n nikira Ana Tangira TE UEA. A bon maiti ana karea TE UEA are E anga nakoia tarira ma manera n tain te katoka bai n tamnei. Teuana mai i buakon ana karea Te Uea bon Te Taetae ni Burabeti. E taekinaki ba e na iai ae e na baka n tong mai buakoia kain te tiim ni mananga. Bon te katauraoi raoi irouia kain te tiim i main te mananga. E bon boo te katoka bai ni kakorakora i aoi. Kain te tiim ni mananga a bon karaoi naba aia tataro aika bati i rarikin te katoka bai ao aia tebwi ma nimaua ni miniti. E taetae Fr

Koru ba a na aki manrerei ma a na bon riai n iri nanon bai ake e tuangia ba a na bon riai ni karaoi.

E a roko te tai are e nang boo iai te mananga are bon te kanimabong 10 n Tun. A boo n nanoia kain te tiim ba a na kaitibo n te umantabu i Teaoraereke i main te nako Bairiki. Ngai ngkane n te tai anne e aki reke rokou ba I makuri ao e aki kariaiakaki taekau ba N na nako. I karaba te Uea ba e anaganai au tai ni karaoa au tataro are te ruaiwa n aoa n te bong naba anne. I karaba te Uea ba e makuri i nanon maneu temanna ba e na anganai te kaibangaki ba katanara. Bon anne te bai ae e tuangai te Uea n te karangaina anne ngke I uti n neboia ni mwengau. I rangi ni kukurei ngke e nikiraki au kaibangaki irou i bukina ba bon te bai ae I butia TE UEA ba e na anganai ai uana naba ma tariu ma maneu ake a bon anganaki naba tibangaia mairoun TE UEA. Tia bane n roko i Tabon Kabauea ao e a waaki te tutia i muin 5pm teutana .

Bon Fr Koru are e karaoa te tutia. Ngke e anaki te kabanea n anene ao e a bon tong naba temanna kain te tiim ni mananga. E koro bukin te taetae ni burabeti ao e nanobwi nanora n te bai ae e riki. E raba te Uea ba e aki maan i muina ao e a uti raora are e tong arei ao n taekinna ba e tauraoi naba ni mananga. Tia roko iroun te Beretitenti ao ti a kamauria ma buuna ao ana utu. E a waaki te nebonebo ao ti bon bane n toa ma tibangara ake ti na karaoi i nanon te moan makoro ao te kauoua ni makoro. Ti karaba te Uea ba a bon rawata bai ake e kaoti nakoia kain te tiim, makuri buaka man ana waaki teuare e buakaka ao aorakin te Beretitenti ma buuna ake a norii kain te tiim ao ake e anganira TE UEA ba ti na namakinna n rabatara. I karaba TE UEA ba e tuangai ba N na tabeka baiu are I taua iai te kaibangaki ma ni kamena I etan te Beretitenti ma ana utu. Iai tarira ake a rangi ni korakora aia ianena ao ngai ngkanne I a manga

kaitaraia ma te kaibangaki. Ti karaba te Uea ba e kaotia temanna raora n tain te tibatiba ba e nora te kaibangaki are e rangi n otanako mai nuka. Ti karaba TE UEA ba E katereterea nakoira kakawakin ma mimitongin Ana Kaibangaki are ti bane ni kamaiuaki ma iai. A rangi ni maiti ana tamnei TE UEA are e anga nakoia tarira ma manera n te tai anne are ai bon ana kamaiu naba nakon te Beretitenti ma ana utu man taian makuri buaka nakoia. Ngke e a bara ao e rangi karabaraba te Beretitenti ma buu-

na ba a bon ringaaki ao bai ni kabane ake a tibaaki n ana tangira TE UEA a bon kakoauai ni kabane. E taekinna Madam Teiraeng ba e bon aoraki te Beretitenti man aki rin kanana. N te tai raoi are ti moan waaki iai ni katokabai tamnei i main te mananga ao e a bon moana naba iai marurungina te Beretitenti ma n rin kanana . Ti karaba TE UEA ba e rang kaota kukureina te Beretitenti ma ana utu n nikiran ana tangira TE UEA irouia. Ti booti banara ni karaba TE UEA ba bon ngaia ae e anga ana kamaiu nakon te Beretitenti ma ana utu.

Ti a oki nakon maneaban te kurubu i Tabon Kabauea ba a tainingaira iai Fr Koru ma kain te tiim ae e nakon teubua tabun maitia. Bai ni kabane ake a norii tarira ma manera n ana tabo te Beretitenti a bon bane n oti naba irouia tarira ma manera aikai. Ti neboa iai te Uea ao ti kamoamo a bukin bai ni kabane aika e karaoi ba e kaotia ae e maka ao n tautaeka i aon bai ni kabane. Ti kukurei ao ti kakatonga irouna ngkai e a tia n rineira ma ni weteira n arara aika kakaokoro ba ti na riki ni koaua ba ana bai ni kawawa ngaira . Ko raba TE UEA ao am bai te neboaki ao te karaoiroaki n aki totoki. Ti a okiri mwengara tao tebw ma uoua ke te aoa teuana n te nukaniabong. Kam raba ao kam na tekeraoi i nanon ana Tangira ARA UEA AE IESU KRISTO ma Tinana ae NEI MARIA.

Kaongora mai iroumi

**Te Riboti man St Pare Pio, Suva
Uriam Timiti, St Padre, Suva Fiji.**

Te kamauri ao te inga nakoimi ni bane tarira ao manera. Ti reitaki ni karaba te Uea n ana kakawakin nakoira ni kateimatoaira ibukin karaoan Nanona.

Ti karaba te Uea n te marurung ae a manga anganira inanon ara botaki, riki rinanoia tarira ao manera ake a manga roroko n reita te nebonebo imuin te tai ae maan n aki roroko. Boni iai naba tarira ao manera aika a manga oki mai Tarawa n reita aia rerei n te USP. Ti karaba te Uea irouia ataeinimane man te PRS ake a raraanira inanon ara nebonebo n aia tai ni motirawa.

Inanon namakaina aika a nako ao ti karaba te Uea n reken ara reitaki ma tarira ao manera aika roko mai Tarawa. Ti karaba Nei Beia n reken ana tai ni kawarira ao n ana tibatiba iaon ana kamimi te Uea inanon kawaran te Beretitenti ma ana utu irouia kain te charismatic i Tarawa. E noraki ikai m'akan te Atua ni buokia ana tia kairiri



“Ti karaba te Uea n te marurung ae a manga anganira inanon ara botaki, riki rinanoia tarira ao manera ake a manga roroko n reita te nebonebo imuin te tai ae maan n aki roroko..”



*“Ti teimatoa n nora
rikiraken te nano ni
kan ikikina riki ma
ara Uea ae Iesu Kristo
rinanoia tarira ao
manera”*

ibukia ana botanaomata. Ti nora naba ikai aron tauraoin ana kamaiu te Atua nakoia aika a onimaki man nanorinano n aron ara Beretitenti. Ti karaba naba reken ara tai ni katokabai iaon Nei Beia ni kakoaua aron korakorara ae tauraoi n anganira te Atua rinanoia tarira ao manera.

N te wiki ae nako ao e reke naba ara tai ni kaitibo ma tarira ao manera ae Nei Maryanne Ian Mikaere. Ti karaba te Uea inanon tibangara ae anganira ma ngaia inanon ara nebonebo are bon “Karawa ae e uki nakoira ngkana ti kabanei nanora ma ara tangira n neboa te Uea.” Inanon ana tibatiba ao ti karaba te Uea n aron kairana ni moan kinaakin raoi te Uea ngke kaina te botaki ni charismatic i Suva n te botaki ae St Padre Pio.

N te namakaina ae September ao bon iai ara kooti n te Maiu ae Onraken te Maiu ae na wakinaki. Bon ara bubuti buokaia tarira ao manera aika a na kooti n ami tataro. N te tai aio ao ti bon bubuti naba ami tataro ibukin Tiaontin ae taman tarira ao manera ae Karekeiti are weteia te Uea n te Moanibong 29 Aukati, 2016.

N rongorongon ara botaki ni katorika iaon Suva, ae te Kiribati Rabi Catholic Community ao e a bon tiba tia ni karaoaki te rinerine ao aikai ngkai kain te Taibora ae bou. Kaitama Tawaka ba te Tia Babaire; Ariti Tekaieti Tekena ba te Kauoman n Tia Babaire; Nei Taoniti Corrie Atanimakin ba te Tia Koroboki ao Kiritione Martin Tofinga ba te Tia Mane. Ti kukurei naba ni katibo ma Fr Simon Kokoria are karaoa ara tutia ni Kiribati n te Tabati ae nako 28 Aokati 2016.

Riiboti mai Betio Bariti Teburoburo Eita, Tiibi Riita St Faustina

Kam na bane ni mauri tariu ao maneu n ana tangira te Uea.

Aikai tabeua kanoan ara waki i nanon te kuata n ririki aio;

Aikai tabeua kanoan ara waki i nanon te kuata n ririki aio

Te reitaki – Tabati / Katenibong

E teimatoa te reitaki n taia are e tabangaki – Tabati & Katenibong. Ni katoa Tabati ao e karaoaki te reitaki n ara tabwena aika uoua ba n te Kaotitaeka i Temakin i muin te tutia are 11am ao i Santo Bauro i Takoronga i muin te tutia are 9.30am. Ni katoa Katenibong ao a teimatoa taian kurubu i nanon makoro ni bon karaoa aia reitaki irouia.

Ana tangira te Uea

- E teimatoa kawaran mwenga ake a wewete i bukin kainnanoan ana tangira te Uea
- E teimatoa naba kabaroan ana tangira te Uea ni katoa Tabati i muin te Tutia n tain te nebonebo (Te Kaotitaeka & Santo Bauro) ngkana iai kainnanoana
- Iai tarira ao manera ake a teimatoa ni buti ni kabuta ana tangira te Uea nakoia taria ao maneia bon i nanon aia makoro.
- Iai naba te kamarurung are e a tiba wak-inaki are makoro ake a marurung a kawaria taria ao maneia man makoro ake a mamara ke akea moa aia botaki n te tai aio ao ni kakaraoa aia reitaki n nebonebo ma ngaia.
- Iai naba kabutan ana tangira te Uea are e kakaraoaki ni katoa namakaina are ti reitaki iai ma tarira ao manera man baeriti aika Teoraereke ao Bikenibeu are a kawaraki iai makoro aika a kakaokoro. N te tai aio ao a tia ni kawaraki ara makoro aika Santa Teretia, Tirotaam te eti ao Tiantaake. N te namakaina ae e na roko (Okitoba) ao e na manga tauraoi ni kawaraki te makoro ae Santo Kabiriera.

3. Te reirei/kooti i aon Te Maiu ae Onraken Te Maiu

Ti teimatoa n nora rikiraken te nano ni kan ikikina riki ma ara Uea ae Iesu Kristo rinanoia tarira ao manera ake a manga tiba wakina aia kooti i aon Te Maiu ae Onraken Te Maiu. Iai aika a tia ni kainaomataki n te reitaki ae nako ao iai naba aika a waki ngkai i nanon aia kooti are i aon kawaia naba ni manga butimaea kainaomatakin te Tamnei ae Raoiroi n te tai ae aki maan.

Riiboti mai Bikenibeu Bariti Nei Kaarewe, Tiibi Riita St Columban

N noran muin ana waaki ni kabane te charismatic i aon ara Parish ae Bikenibeu ao e oti ae iai aron nakoraoin ao butiraoin ara waaki ni kabane mai irouia kaina man makoro aika kakaokoro. Ti nora iai aron keraken maitia kaaina ao riki te kekeiaki ae bati irouia makoro ake a boni mate ke bon akea ngkoa te charismatic i aona ba tao e a boni mauna nako (e.g Tebonnana ao Santa Riita Buota). E teretere naba ikai ba teirakeia tarira ao manera aikai bon man muin te reitaki are ti kakaraoia ni katoa moan kanimabong ma kain Betio ao Teoraereke are ti karaoa iai te buti i aan auti ma kain te tiim. Bon kaawa aikai ake ti bon moani kawari man ara Parish ae Bikenibeu.

Tiaki ti anne ma e a bon rangi ni korakora naba ngkai te kakariaia ao te



ingainga n n a n o irouia ara mitinare n ara Parish aei ba n n i n g a i m a n g a kawaran naba aia k a a w a i r o u i a kaain ara tiim i bukin taai aika i maira. E oti naba n

ana maroro ara katekiti n te charismatic ae Tekaa man Tebonnano ba ara makuri ae ti karaoia aei e bon rangi ni ibuobuoki nakoia katekiti. Bukina ba ti a karaoa tabeia n aia makoro ni kawari mwenga ni kabane ao riki ni manga nikira ana tangira te Uea nakoia utu aika kakaokoro are e a manga karekeangungun nanoia ni manga okira te tutia irouia ao ni manga irira wakini te makoro.

Riiboti mai Marakei Bariti Nei Mee Tonganibeia, Tiibi Riita

E roko ana tiim te kaeretimaeteki i aon Marakei n Ritemba 2015 ao a buti n nikira ana tangira Te Uea nako aan mwenga ni kabane. N te tai anne ao e bon korakora namakinan ao norakin ana kamaiu lesu nakoia kain abara ae Marakei.

N tain tikun te tiim i aon Marakei ao a noria ba e bon mamara te waki ni kaereti-maeteki i aon Marakei ngaia are i main okia nako Tarawa ni Beberuare 2016 ao a katea ara taibora are e teimatoa ni marurung ni karokoa te tai aio. Ti karaba Te Uea n te marurung ao te uki n nano irouia kain Marakei ao ti noria ba e rikirake maitia ara koraki ao e rikirake naba te korakora.

Kanoan te waki:

I muin okin te tiim ao e a wakina ana makuri te taibora ni moa man te kamarurung nakoia kaina ao ni manga akawaia riki tarira ao manera. N te tai aio ao a toa ara kawa aika 8 ma aia kurubu nako. Kanoan ngkanne ara waki ae ti a waki i nanona ngkai bon;

- Te rereua ni katoa namakaina are ti buti iai inanon kawa. N te namakaina ae Turai ao ti rereua n te kawa ae Tekuanga.
- Ni katoa tain ara rereua ao ti karaoa

naba kainaomatan te Tamnei ae Raoiroi nakoia tarira ao manera ake a bane aia kooti. Iai ara koraki aika a kainaomataki irouia te Tamnei ae Raoiroi ni Meei, Tuun ao Turai ao iai naba aika ti kantaningaia nakon te namakaina ae e na roko.

- N tain naba ara wiken n rereua ao ti karaoa naba kabutan ana tangira Te Uea nako aan mwenga n reita naba aron kabutan uramakan te ai n te kawa ae Tekuanga. Ti moana karaoan aio man Tuun ao are e a riki ngkai ba kanoan ara waki naba ni katoa namakaina. Ti bon tibaira naba nakon ara tiim aika onoua (6) ae kaka waniman kaina ao ti a tibatibai naba autin Tekuanga nakon ara kurubu ake onoua.
- Ti bon mamanananga naba ni kawari auti ake a bubuti kainnanaan ana tangira te Uea ibukia aia aoraki n tai ake e kainnanaoaki iai ana tangira Te Uea .
- Ti aki toki naba n rereitira n ara kurubu nako n te Rotario are ti moanna n tai nako man 9 bongin te namakaina koraki.

Ti kakaraba riki Te Uea n te marurung ao te korakora nakoia kain Marakei n te tai aio ao riki bon ara katekiti are e aki toki ni iririra ao ni bubuokira n ara waki ni kabane ake ti iangoi ibukin kabutan ana tangira Te Uea.

Taeka n reirei

Ti na roko n te Abanuea ae Karawa ngkana ti kakaraoa Nanon te Atua

Uriam Timiti, St Padre Pio Suva, Fiji

Nakomai ngkami aika kam karaoiroaki ao maeka ma Ngai n te Abanuea are I a tia ni katauraeia ibukimi. Ai kakukureira ngkana e a roko te tai ni motikitaeka ao ti ongo banaan te Tama ae weteira ao ni kaaira Nakoina ba ti maeka ma Ngaia. Bon aio te bai ae na riki nakoira ngkana ti kakaraoa Nanon te Tama inanon maiura. Bon aio kanuungan ara makuri aika raraoi aika ti kakaraoi inanon maiura. Bon aio te kanuanga ae tauraai ibukira ngaira ake ti a tia ni kariki ua aika raraoi inanon maiura.

Te reirei ae kakawaki ibukira n te bong aio ba e na reke te maiu ae aki totoki n te Abanuea ae Karawa iroura ngkana ti teimatoa ni kakaraoa ae Nanon te Atua. Bon aio te bai ae ti reireinaki n te tataro are



*“Nakomai ngkami
aika kam karaoiroaki
ao maeka ma Ngai n te
Abanuea are I a tia ni
katauraeia ibukimi”*



“Tamara are i Karawa” ba ti na kabanei maiura n neneboa te Atua ao ni kakaraoa Nanona iaon te aba n ai aron are karaoaki i Karawa.



A na motikaki taekara man arora ae ti mena inanon ngkai ao tiaki are ngkoananoa ngke n taai aika a bakanako. Ti aki kona n tuanga te Atua ba E na kamaiuira ibukin ara makuri aika ti karaoi ngkoa ao ti aki ngkai. E katereterea te Atua ba tera ae na reke nakoira ngkana ti kakaraoi makuri aika bubuaka aika aki botau ma Ana kantaninga. N ai aroia uean Iteraera ake aki ongotakea iroun te Atua ao a tannako mairouna ao bon iai te rekenikai ae ti noria ba a anganaki ba a uruaki abanueaia ao a mate. Bon aio ana Taeka te Atua nakon Toromon ngke e katea te moan temboro ba E tauraoi ni maeka ibuakoa ngkana a kawakin ana tua ao ngkana a aki ao E na kamaunanakoa kaubaina ma mimitongin abanueana. Bon aio te bai ae riki naba nakon uean Iteraera ae Jehoiachin ba ngke e tannako mairoun te Atua. E buakanaki ao e kamaunakoaki abanueana iroun Nabukneta ao a riki ba taenikai ngaia i Babiron. Ti na butia te Atua te wanawana n onimakinna ao ni kakaraoa ae Nanona inanon maiura ba ti aonga ni karekea te maiu ae akea tokina i Karawa.

**Iriribia ni kauramwaaka aina: Kateimatoan ao kabutanakoan uramwaakan te ai rinanon te mwakuri n nanoanga – Te ririki n nanoanga. Iroun Te Tari James Shin
Nenenteiti Teariki-Ruatu, St Columban Bikenibeu Bariti**

E a tia n katanoata Tamara te Bobe ae Bobe Bwaraniko, bukamaruan ao kaurangan te ririki n nanoanga. Ibukin te ririki ae e tabu aio, ao te kibunikora e kangai mwanewena: ‘Bwaina te nanoanga, n ai aron Tamam are i karawa, ae e bati n nanoanga’ (Ruka 6: 36). Te banna n kakairi are e kona n kaira ara iango iaon taekan te kibunikora aio, e kona n noraki inanon te rongorongo are karakinan te ITamaria are e raoiroi.

Tabeua te ririki n nako, n rokou iaon te aba ae Uganda (abaia lbwatabwata n te aono n Aberika), ao e reke au tai n kaitibo ma temanna te teinimwane ae e ‘maiu n kainnana’ are e aki toki n bububuti irarikin te kawai n te tabo teuana ae e aranaki bwa Kampala. Te teinimwane aio iai irouna te kakatikitiki are e rekereke ma aorakin te kaburoro, n te aro are e riki naba bwa temanna te teinimwane ae e roo abana. N te aro aio ao angin te tai, e maeka n aki akaka i tinaniku ao n maiu naba n amwamwarake n taian bwanana ake a bubuaka ao n moo n ti te ran. Ana kawaerake ao oneana a onrake naba n te nakotari, ao ngkanne ko kona naba n iangoia bwa boirara ngkanne te teinimwane aio. Rokou iaon te tabo aio, bon ngai ma raou tabeman man te tabo ae e aranaki ae Kkottongnae, bwa bon kawai naba nakon te marae n waa-ni-kiba. Ngke ti nora te teinimwane aio, ao ti aki tabwara bwa ti a katea naba ara kaa are ti bane n toka iai ngai ma raou akekei, ti kawaekoaira n ruo ao ti a kawara naba te teinimwane aio. Ti uota te ran ao ti a teboka ao n kaitiaka naba raoi te teinimwane aio, ti oneia naba n onea aika a raroi ao rimwi ti a manga karekea mwengana ae e na kona n maeka ao n mwengaraoi iai n te tabo are ti noria iai. Irabubua mwaitia aomata ake a bane n tei n tiaoki ao n ubu n tounako ngke a bane n matakuaikina te bwai are ti karaoia nakon te teinimwane aio. Te teinimwane naba are bon akea okorona ma are a aki toki n nonoria n katoa bong irarikin te kawai n bububuti, n katoa te tai are a toua kawaia iai, n akea temanna irouia are e a tia naba n kabanea ana tai n buokia n kainnanona. Kanga n ai aron naba ngkoa rongorongon te aomata are e bubura nakoana n te temboro ao tibun Rewi, ake a bane naba n aki nora ao n buoka kainnanon temanna te aomata are e wene n kananoanga ao n kainnana buokana irarikin te kawai, inanon te karaki n kaikonaki iaon rongorongon te ITamaria are e raoiroi.



N te ririki aio, ao Tamara te Bobe Bwaraniko, e katuruturu taekan ‘ana nanoanga te Atua ae e nene n teimatoa ao n koaua; ara tangira ao ara mwamwannano ibukia raora, a riai n bane n karaoaki ao n kaotaki rinanon te mwakuri’ (Misericordiae Vultus, 6). E reitia riki n kabwarabwarai ngkanne aekaki n mwakuri n nanoanga tabeua n aron aikai, ‘kamwarakeaia te koraki ake a baki ma akea kanaia, kamooaia te koraki ake a bora n taka ma akea nimaia, karekean oneaia te koraki ake akea karabaia, butimwaeia aomata aika a raka, kamarurungaia aoraki, kawaraia te koraki ake a tiku n te umwa n kaikain’ (Misericordiae Vultus, 15).

Ana tangira te Atua, e kona n kab-

*“N te ririki aio, ao
Tamara te Bobe
Bwaraniko, e
katuruturu taekan
‘ana nanoanga te Atua
ae e nene n teimatoa ao
n koaua...”*

warabwaraki bwa te tangira ae e kabwara bure. Inanon mwakoro 15 n ana ewangkerio Ruka, te abotoro ibukin te nanoanga, ao e kabwarabwara raoi n te aro ae e kateke nano, taekan ana tangira Tamara ae e nanoanga ao e kabwara bure rinanon karakinan te nati are e bakatae. N rongorongon te nati aio ao e oti bwa n okina nakon Tamana, imwin bakataean maiuna ao banen kaubwaina n aki akaka are e a tia n bane n reke irouna, ao Tamana e teimatoa naba n butimwaeia ma te tangira ae e kororaoi nakoina. Ai bon kakatekera ao ai kororora aro aron ana tangira n nanoanga te Atua!

N te tabo are Kottongnae, ao e kania aua tabun te ngaa (4,000) mwaitia te koraki ake a tia n kitanaki, a aoraki ao a maiu n kainnana. A aki ti rotaki te koraki aikai n aorakin rabwataia ma aia iango ma a taonaki naba n nanoia ae e uruaki man rawawata. A uouota te maneka n nano ae e bubura man mwakuri n bakatae ake a tia n karaoaki nakoia inanon maiuia n aron katinanikuai, mwamwanakia, ribakia ao kitanakia irouia te koraki ake a tia n taneiai ma ngaia n te moan tai. N ai aron naba te nati are e bakatae are e bane n bua kaubwaina ao imwina e kaitibo ma te unra, te katinanikuaki, te riribaki, ao te tekebuaka ao n tokin te tai ao e a manga okira tamana are e a tia ngkoa n kitanna.

Tao anne bukina ae lesu e kaitiboaki naba ma te kakeaki, te mwamwanaki, te kamwaneaki ao te kitanaki bwa e aonga naba n atai raoi manekara ake ti taonaki iai n te aro bwa e na kona raoi n kororaoi aron kamaiura ao buokara irouna? Ngaia are ngkana ti tangiria naba bwa ti na kamaiuaki ao moan baan te kakawaki bwa ti riai n aki ti tararuaira bwa ti na marurung raoi n rabwatara ao n ara iango ma ti na bon riai naba n marurung raoi n tamneira n taainako. Karaoan aikai irouna, ao ti na kona ngkanne n karekea te tangira n nanoanga iroun Tamara, n ai aron naba ana tangira te Tama are e angan natina are e bakatae ngke e okiria, n aron are e oti n te karaki n kaikonaki anne.

Te bwai ae e kakawaki bwa ti na aki momotiki taekiaia ke n tarai kanoan taai aika a tia n nako iroun temanna ma temanna. Ma ti riai n angania tarira ma mwanera aikai te akoaki are e irianaki n te tataro ao te nano n tituaraoi. Te koraki ake a tia n butimwaeia ao n kainaomata te Tamnei ae e Raoiroi irouia, ngaia ake a reke irouia noran ao kaotan ana mwakuri n tangira Kristo n karokoa tokin aonnaba. Karaoan ao maiuakinan aio irouna bon ana bwaintangira naba te Atua, ao bon teuana naba te kawai n katanoata maiun te ewangkerio inanora. Ae ti noria naba n te rongorongon aio bon kaotan naba ana tangira te Uea rinanon karaoan mwakuri n tangira ao n nanoanga inanon maiura nakoia raora ake a maiu n kainnana ao a taonaki n te kanganga. Ao karaoan aikai irouna bon teuana naba te kawai ae e boou n katanoata te ewangkerio ae e maiu n taainako. 'E aki riai bwa e na taka te Tamnei' (1Th 5:19), e taku te abotoro are e kakannato.

Ti na kateimatoa kabutanakoan uramwaakan ain ana tangira te Tamnei ae e Raoiroi, rinanon kakatanoatan ao tataekinan bwaintangira

ake a oti n karaoan mwakuri n aron taian taetae n burabeti, karaoan mwakuri n kamarurung rinanon kaotinakoan te riaboro, karaoan mwakuri n katoki aoraki ao kamimi ao n ai aron naba ana mwakuri te abotoro ae Bwauro ngke e mwamwannanoia naba aomata ake akea aroia bwa a maiu n kainnana (Gal 2, 10). N oina n koaua ao e aki kona n kamaenakoaki ana mwakuri te Bentekota ma ana mwakuri te tangira are e kaota kororaoin ana nanoanga te Atua. Aio are e oti inanoia aomata ake a tia n butimwaeia ao n kainaomata ana mwakuri te Tamnei ae e Raoiroi rinanon ana taeka ae e tabu Atuara are e kangai, 'Are ko karaoia nakon temanna ao ko karaoia naba nakoiu' (Mt25:40).

Ana Tangira Te Uea

**Ana Tangira Te Uea i Norauea, Marakei Bariti
Nei Mee Tonganibeia, Tiibi Riita**

N ingabongin te bong ae te kaonobong 30th Turai ao ti kawaekoaki nakon te aoraki i Norauea ae arana Tarotuma. Te aoraki aio e taniaki ao ai tenibong ana bong n te kaonobong anne are a wewete iai ana koraki ni bubuti kainnanaoan ana tangira Te Uea nakon aia aoraki aio.

Moan rikin aorakina aio ba e mananga mai Tekarakan n te Kauabong ba a raun nakoia aio koraki i Norauea bon ngaia ma buna ao natina ae uareke. Tiaki aio te moantai n riki ma e bon ririki nakoina n rorokona i Norauea ma e rangi n uareke. N taai aika a nako ngkana e roko i Norauea ao te bai ae e namakinna bon ti te maku ao e a manga nimaoraki ao ngkana e manga okira Tekarakan ao e a manga marurung n te tai ae waekoa.

N te tai aio ao e a bon rangi ni kamimi aorakina are e roko ba e a bon rangi ni maku ao n takaka n te aro are a bon minotaki aio iango ana koraki n aorakina ao a bon bane ni kakoaua ba e a bon reke irouia taimonio i Norauea. Te bai ngkanne are e a riki irouna ba ai bon te tangitang ni maku man te kabong. E aki toki naba n taekina ibuakon tangina te taeka ae kangai "I maka Kaaitang" ae aran te kainga ae a uakan ma ngaia bon i aon naba Norauea. Ngkana e manga anganaki natina ba e na kammamma ao e un ao e taku ba akea natina ba e a tia ni mate. E aki matu i bukin makuna ao are e bon kakoauaki n aron tangitangina n takaka are e ngaina ngainana. E aki toki naba ni kan birinako ma e a teiakinaki irouia kain ana auti ao n tatautauaki ba e na aki birinako.

A roko kain te kaeretimaeteki irouna n te ingabong naba anne tao 11am ma e a kaman nora te roko ao e a kaman bubuti buokana ba e taku ba a nang roko tan ioawa. E kataia ni manga birinako riki ma a rokanna ana koraki n te buia are e in ae e oaki ba e na aki birinako. Ngke e a tei te kaa iaan ana auti ao ngaia e a bon rangi n takaka riki ao n maku n rang ao e rangi n inimaki n iangoa birinakona ma e a bon tautauaki.

E waki te tataro irarikina ao e bon rangi ni kaitara ni karokoa e a marau riki ao e a buti-



*"N te tai aio ao e a bon
rangi ni kamimi
aorakina are e roko ba
e a bon rangi ni maku
ao n takaka n te
aro..."*



*“Kaberoron te aoraki n
te tai aio e karika te
maku ae bati”*

maea te tataro ao n irira aron te tataro are e kairaki. Ti kabanea tao 2 te aoa n tataro ao n nebonebo ma ngaia n ana auti ao imuina e a manga uotaki nakon matan Te Eukari n te umantabu. Ngke ti roko ikekei ao tia manga waki naba n tataro ao n nebonebo ao te kakukurei ba e a bitaki naba taran te aoraki ba e a bon oti naba irouna te ubu ni marurung. E a tataro ao e a bon oti n ana tataro ni karabaraba ake e tabeki ba e a bon kamaiuaki ao ni kainaomataki man te mwaka are e tautoronaki iai.

E marurung te aoraki n te tai anne ao a nako taimonio aika a bati ake a bon noraki rinanon ana karea Te Uea. A rangi ni maiti taian noraba inanon te tai anne ma aikai tabeua ake a katuruturu iai ba aorakin te aine aio are e bon taniaki irouia taimonio.

E noraki te baa i nanon tain te nebonebo –

Te baa aio e aki ataia ae kakaai n te tamnei ae buakaka ba e taku ba te boiarara ba tiaki kabirana ma e iraea mairoun raoraona.

E noraki antin Kaaitang aika aintoa aika teniman

E noraki te nangi roo i aon te aoraki ao i nanon te auti are e mena iai

E kaoti naba aran Tabuariki

E noraki naba te manono i aan aia buia

Ana tibatiba te aoraki ao e taku ba e a rangi ni marurung ao e a oki ana iango ao e taku ba e a tiba ataia ae bon iai natina. I nanon te nebonebo ao e roko namakinan te angi ni mate irouna ao inanon te tai anne ao e ongo te tataro ae e anganaki – *“Tara Iesu n te Eukari ba e nang kamaiuko – ao butia kangai, Iesu buokai”*. E tibia man taku ba ngke e tara Te Eukari ao e tabeka ana tataro aio ao e a bon namakina naba kamaiuakina. E namakina ae e a reke angin nanona ao e a bon namakin naba baika a karaoaki nakoina ao e a oki ana iango.

Ngke e a bara ao ai raora n toka n te ka n oki ba e a manga okira naba ana kawa are Tekarakan, bon ngaia ma buna, tinana ao natina are uareke. E bon maroro ma kain te kaa ao e oti ba e a bon rangi n marurung. N te tai aio ao e a rangi ni marurung n aron are bon akea te bai ae riki mai maina.

E raba Te Uea ao E na neboaki i aon bai ni kabane.

Ana tangira te Uea nakon Tiantaake, 16 yrs i Buota)

Nei Kaarewe, Tiibi Riita. St Columban Bikenibeu Bariti

N tairikin te Tabati teuana i nanon Turai ao e nikiraki temanna te teinnaine iroun ara tama ae te tama Ispasio i bukin aorakina ae ibeia te maraki. N rokona n te tairiki anne ao e bon tatarakua n tang ao a maiti aomata ake a bane n roko ni mataku, riki bon kain te makoro ae Te Rooti ae Kamimi n raonaki irouia ataein te roro n rikirake are a boni kabane n te tai anne n Santa Maria maneaba.

E ataki ba te bai ae buakaka aorakina ba ngke e taaraki n te ran n tabu iroun te tama

ao ai aron ae e a katakaruaeaki riki n tang ao n tatarakua ae e buee n te rantabu. E kanako taeka te tama ba a na weteaki kain te charismatic n te tai anne ao man anga ana kariaia ba e na karaoaki te katokabai n te tai ae waekoa i aon te aoraki.

I muina ao e karinaki n te umantabu ao e a wene iai man tatarakua n tang ibuakon marakina are e aki kona moana. Tarakina n te tai anne ao e a bon tibu man bane tikin birotona. E wene ni baraki ao mani minominotaki ao n tatarakua n tang. I nanon minominotakina ao e a manga meimeiria ao a roto oneana ni kabane.

Ngke a tabe n roroko ara koraki ao e a waki naba te korona. Kaberonon te aoraki n te tai aio e karika te maku ae bati ao te ingainga n nano ni kan karokoaki n tokina are te katokabai i aona. I muin te korona ao e a waki te nebonebo ao n rimuiaki ma te Bau n nanoanga. E karaoaki kabaroan ana tangira te Uea nakon te aoraki ibuakon tangina n tatarakua. Aio are e a karina te ang ae korakora irouia kain te tiim n aia ribano n ianena ao e a bon rangi n rebwetaua riki banaia i aon aia aoraki. Tao i nanon 5 te miniti ao e a kerikaaki tangina ni karokoa ae e a bon toki ao man matunako i aan baia kaain te tiim. I nanon are e nang roko n tokina ao e a manga uti ao e a wanna te ngare ao te kukurei are ti a kona n noria. E raba te Uea n ana kamaiu nakon te teinnaine aio.

N taian karea ake a tibaki n te tai anne ao a bati tamnei ake a noraki ao tabeua mai buakona bon

- te rabono are e nako mani birotona,
- te moti,
- te boki,
- te mwaniba,
- te baa,
- ao e nooraki naba mweengaia ao a mwaiti riki.

N te tai naba anne ao a kanakoa banaia kain te tiim nakon te aoraki ba ngkana arona ba iai rekerekeia ana karo ma baika a noraki ao a riari ni katokia kitan ba e aonga n inaomata raori te Uea irouia ao ngkana aki ao e na bon manga oki naba te aoraki.

Ti kauataoa te karabaraba nakoia ana karo te aoraki aio ba i nanon ara tai n rereua i Bikenibeu n te moani kanimabong ae nako (August) ao a kaa te tiim ba a na kanakoi aia bai n tabunea ake ni mwengaia. I main manangan te tiim ao ti boni kawara ara tama ao e a karaoira ao ni katekeraoa manangara i bukin karaoan tabera naba mairoun te Uea.

N rokora ni mwengaia ao 12 kain ara tiim a iranako teunaine are tinan Tiantaake n anai ana bai n tabunea ni kabane ao a uoti rikaki ao ni kaurai ni kabane i tinanikun te auti are ti ikotaki iai. A bon aoria n urarake baai ao kaain te tiim ake 12 a karaoa naba aia nebonebo ni katobibia ni karokoa ae a mauna nako rabataia. Nikiraia kaain te tiim a karaoa aia Rotario i nanon te auti n tataninga tian aia makuri ao ngke

a tia tabeia ao a rinnako nako nanon te auti. Kabanean ara makuri ti a manga karaoa te katokabai riki iaioia kaain te mwenga ni kabane ni kaitiakiia ao ni kaitiaka naba mwengaia.

Ana Tangira te Uea i Abatiku Abemama 6 Maati – 13 Maati 2016.

Ioane Teingoa, Teaoraereke Bariti

N te mwenga teuana iaon Abatiku are ti kawaria ao ngaia te aine are ikawain te mwenga anne ngaia e mena irouna Taburitengoun. N tain te nebonebo ao e a oti ao n tain te katokabai ao e a kiriwe te riaboro ao e a ki karaua te aine aio, ngaia are e a tatarakua ao n rawa ni kan tuaki. N ana noraba Katarina ao e a nora Taburitengoun n toka i aon biroton te aine aei ngaia are e a kibaria naba ao ni butia lesu ba e na anaia ao ni kabaea i aan ana Kaibangaki, e un te aine aei ao e kataia n orea Katarina ma e tauaki ao e a katiributaea naba Nei Katarina bon uoua (2) tabun ara aoa ni kakorakora ma ngaia ma e raba te Uea ba E a ana naba te riaboro aei mairoun neiei ao e a rau naba. E tibaia neiei ba te riaboro aio bon ana makuri temanna te aomata n ribuaka nakoia ngaia are e bon irianako teuare buna, ma ngke arona ba e kauiaa rokomi ao e na bon maeu naba n ai arou ngkai I atai ba e a tia ni kitanai ao e raraba riki te Uea. Neiei ngkai e a rinnako n te botaki n tataro ao e a tia naba ni kainaomataki. E raba te Uea.

N te kauoua n auti ao ngaia e a bon tia ni kamanenaki te auti aio irouia taan kainikamaen are riaborona Raitinikarawa. Boni ngai are I kaira te kaitiaki ao I a butia naba lesu ba te riaboro ae Raitinikarawa, E na anaia ao ni kabaea i



aan ana kaibangaki ao n aki manga kariaia ba e na manga okira te mwenga aio. N ana karea Katarina ao e a kaoti Raitinikarawa nakoina ao n taku: “Ai tiba rokomi ikai ao kam a ti kanakoai naba man au tabo ae I tangira ba I a rangini maan iai,” ao e bobonako ao e raba nako “... ao e aoria ba a bon rangin bati ami tabo ni maeka ao bon nneu ni koaua bon Baretoa”, ao e kotea Baretoa ao Katarina e a bon nora aia auti ae e mena I meangin te kawa i tabona ae iai te bangota i rarikina. “E aoria, N na nako ma N na manga iangoa okiran au tabo aio”

Te kateniua n auti ngke e a bo te tataro ni kaitiaki iai ao e a nora naba ana boki te mane are kain te auti Katarina. Ngke e ongo aei te mane aei n tain te tibatika ao e taku, “Bon akea au

kantaninga ba kam na nora au boki aei, ao e koaua ba iai irou ao kam na iranna ngkanne?” ao I kaeka te mane aei ni kangai, “ngkai e noraki ao akea riki taekana ba ti na anaia n urua.” E anga ana boki te mane aei ma te tang ae korakora.

N te kaaua n auti ao n tain te kaitiaki ao aikai karea ake a otinako: Nei Tebuka (kain te tiim mai Bikenibeu), e kubanako ba n tain te katokabai ao e a ti totinaki naba matana, ao e butia lesu ba E na kabaea te bai are e kaota matana, ao e kubanako ngke e noria ao ai buan te U n rabano. Katarina --N tain te katokabai ao e nora teuare kain te mwenga n raranga buan te U U arei. E kakoaua te kaotioti te mmane anne ao e anganako ana U i bukin uruakakina, ao e karaba te Uea n ana makuri. Teuai e a rinnako naba i nanon te kaeritimaeteki ao e a tia naba ni kainaomataki.

N te auti naba aio n tain te katokabai ao a maiti taian tamnei ao teuana mai buakona e a noraki Rianewekabane n tei irarikin Tauanraoi n ana karea naba Katarina. Aio ana tibatika Tauanraoi. “I bon rangi ni mimi n ana noraba Katarina ba au iango ngai e na bon aki noraki ba kam aki ata anuan maeu n rikirakeu ma I tounako ngkai e noraki naba ao e koaua ba I rangi n nim ma tibu aei n tai aika a rangi ni man ao ni bakanako ma ngaia bon akea naba rabana ba kam noria naba. Ngai I a ngae n au aro ae te Aro-n-Tang ao I taku ba ti bon kaeritimaeteki iai, ma ngaia bon iai te kaokoro ba ai manra ngai n au Aro arei ao bon akea naba te noraba ae I noria ao irouia naba kaina n aiaron ami kaeritimaeteki. E aoria ma te bai ae ringa nanou bon aron ami tataro ami nora ba ao titebo n rokomi aei ao I anganki te koaua ae N na ira ami waki anne ao n rin naba n ami Aro anne”.

Te Maiu ae Tabu

SANTO BENETITO

Arana: Benedict
Bungiaiki: 480
Mate: 21 Mati 543
Abana: Nursia, Umbria, Itare
Ana toa: Turai 11
Santo i bukin: kaitaran te tabunea/riaboro, taian kariri nako, te boitin ao aorakin te kirine.

Benetito bon kain te kawa ae Nursia i aon Umbria, Itare ao bon natia kaubai. Iai bwebwena te aine ae e santa naba ae arana Scholastica (Koratika). E rangi ni kinaki Benetito n ana boki ni kairi n ana utu ae te Benedictine ao te Cistercian ao e tabangaki naba kabonganakina n utu ake tabeua.

E kanakoaki nako Roma ba e na reirei ma e aki kukurei ngke e noria ba e korakora te bubuaka ma makuri ni bekan ao ni kamangaongao i aona. E ribai anua ni maiu aikai ao e rawa naba n tatarai aomata aika a taonaki n te maraki ma te rawawata i muin te buaka. E atai ba akea ana anga ni karaba man te rawawata ao te buaka aikai ngaia are e motikia ba e na kitanna.

E rianna nakon te kawa ae e uareke i



“I bon rangi ni mimi n ana noraba Katarina ba au iango ngai e na bon aki noraki ba kam aki ata anuan maeu n rikirakeu ma I tounako ngkai e noraki”



*“A kaboitina nimana
ma a rangi ni
kubanako ba ngke e
katituaraoa nimana ao
e a bon raeuaki naba
ana mangko..”*

rarikin te maunga ae Subiaco – 40 te maire mai Roma. Ngke e a roko n raben te maunga anne ao e kaitibo ma te tama are e mamaeka n te nanganga ikanne ae arana Romanus. E maroro ma ngaia ao e kaota nakoina bukin rokona n te tabo anne. E kaunga nanona Romanus ba e na tiku n te nangananga teuana ikanne n ai aroia ao e tiku iai 3 te ririki. Bon akea ae e ata rongorongona ae e maeka ikanne ngkai bon akea ae e rereitaki ma ngaia ba bon ti Romanus are e kawaria ao n ninikira kanana n tabetai.

I nanon tikuna ikai ao e korakora bitakin ana iango ma aroarona ao e noraki ba te aomata ae tabu. Man noran kakai ake e karaoi ao a bati aomata ake a mataiakinna ao a kan tiku ni kairaki irouna ao n riki ba ana reirei. N te taina ngke e a mate mataniwin (abbot) te utu teuana ae e uakan ma ngaia ao a roko ni butia ba e na kairia. E kinaia kain te utu aio ba a rangi ni kaokoro anuaia ma ngaia ao e ataia ba a na bon aki kukurei irouna ma e bon butimaea naba aia bubuti. E aki maan i rarikia ao a ribaia naba ma e a kanganga ae a na kaotia ngaia are a iangoa tiringana. A kaboitina nimana ma a rangi ni kubanako ba ngke e katituaraoa nimana ao e a bon raeuaki naba ana mangko. E ataia ba a rangi n ribaia ngaia are e a teirake n okira ana tabo i Subiaco.

I bukin tabangakin tangirana n te aono anne ao a bati naba ake a bakantang irouna ao a kan tiringa naba. Iai temanna are e kaboitina kanana te kariki ma ngke e tabe Benetito ni katituaraoa kanana ao e a roko naba te man ni kiba (raven) ni uotia nako. Ngke e a ataia teuaio ba e aki kona ni kamanea Benetito ao e a manga okiria ana reirei ni kariria ao n anai nanoia irouia kabekau are e aki toki ni babaronga manangaia nakoia ba a na kabakaia.

E katei 12 tabo n tama (monasteries) ao ni ikotia naba tama ake a uamaenako ao ni bon titiku irouia n te nanganga n aonon Subiaco.

N te ririki 530 ao e a kitana Subiaco ma ana reirei tabeman nako Monte Cassino ni karoroa ma taian kariri ake aki toki ni karaoaki nakoina. A tiku i taberan te maunga teuana i marenan Roma ao Naples ao e katea iai ana utu ae te Benedictine. E tiku ikai ni katia ana tua i bukin kairia ana koraki ao e mate ikanne n aorakina ae te kabuebue n te ririki 547.

Ana tua aikai a nako man ana boto n iango are te **Tataro ao te Makuri**. E kantaningaia iai kain ana utu ba a riai ni kabanea 8 aia aoa n tataro, 8 aia aoa ni motirawa, ao 8 aia aoa ni makuri n te bongina. E karimoa te tataro i bukina ba e rangi ni kakawaki maiuakinan te tataro irouia – te tataro n reitaki n aia utu ao te tataro n ti ngkoe. **Te makuri** ngkanne tiaki ti te makuri i bukin te botaki ke te utu are ko mena i nanona ma bon te makuri naba n ibuobuoki nakoia aomata ni kabane.

TE METERA TE BENETITO – rongorongon te metera ma kababararan taeka ake i aona; *N te ririki 1647 ni kabowiaia aine aikan tan tabunea ao a kaotia aine aikai ba akea kora-*


koraia ni kaitara te tabo ae Metten Abbey ba e katanaki n te kaibangaki. I muin tuoan te tabo aio ao e noraki ba e onrake oona n taian kaibangaki ma manin taeka ni koroboki ake a koreaki ngkai i aon ana metera Santo Benetito ma a manuokinaki nanoia. I muin kuneakin te boki are e koreaki n te ririki 1415 ao e noraki iai tamnein Santo Benetito ae e taua te kunikai ni koroboki ae te roora (scroll) i baina teaina ao ana kai ae kaibangaki tabona ni baina are teaina. I aon ana kai ma te kunikai ao a koreaki raori baninin taeka ma kauarerekeia n aron ake i aon te kaibangaki. Bon maikai are a karaoaki naba iai taian metera aikai i aon Tiaman ao ni butinako n aonon Eurobe.

Mai moa

- Tamnein Benetito ae e taua te kaibangaki n ataina ao te boki are a koreaki iai ana tua ni maingina
- Tamnein te raven n iterana teuana ao te mangko n te iterana (te mangko are e kaboitiniaki iai Benetito ao e uruaki, te raven are te mannikiba are e uotanako te kariki are e kaboitiniaki)
- A koreaki i aona taeka aikai – Ana kaibangaki te tama Benetito
- E ramaneaki n taeka aikai – *Eius in obitu nostro praesentia muniamur*, Ke E katanira n tain matera maekana (te Uea) i buakora

Mai buki

- Te kaibangaki i bukin karinean maiun Santo Benetito
- CSSML – *Crux Sacra Sit Mihi Lux* – Ke e riki te kaibangaki ae tabu ba otau
- NDSMD – *Non Draco Sit Mihi Dux* – Ke e tai tautaeakanai te rakon
- CSPB – *Crux Sancti Patris Benedicti* – Ana kaibangaki te Tama ae Santo Benetito
- N tabetai e koreaki PAX – *Te raori ke IHS – Iesu* i etan te kaibangaki.
- VRSNSMV – *Vade Retro Satana, Nonquam Suade Mihi Vana* – Nako akuu tatan, tai kamaneai n am kamoamo / n am bai aika akea maneia.
- SMLQVIB – *Sunt Mala Quae Libas, Ipse Venena Bibas* – Matennanom baika buakaka, ngaia ae Nima oin am boitin.



Nei Maria Tinan Te Atua.

“Te teinnaine, tai kakamakuri!”

**Nei Teburoburo Eita, Tiibi Riita St Faustina
Betio Bariti**

N tairikin te bong ae 18 n Tianuare 1896 n tain te kamaitoro (winter) n te aba ae Spain, n te kawa ae Rojales, ao e tabe n toutoua nako kawaina mai rarikia ana karo temanna te teinnaine ae ai tiba 3 ana ririki ao n tokina e bon bua. E buta nako rongoron-gon buana n te tai naba anne ao e a buokaki ni kakaekaki irouia kain te kawa ao a uraia rinanon ao ri tinanikun naba te kawa ma e bon aki reke.

E reitinako te kakaekaki ni karokoa te bong are i muina ma n te tai aio ao ai bon akea kantaningakin ae e na kuneaki ni maiu. Ngke e a bo 3 n te bakantaai arei, ao a kubanako ai tinana ma ai tamana ngke a noria ni karaua n tekateka n rara te atibu ae bubura kaei ma tarakina irouia titabo ba e a mate. Ma a manga kubanako ba ngke a wetea arana ao e a bon teirake naba ao ni biri nakoia ao a noria ba e rangi n tara n tiba uti.

A titirakinna ni kangai, *“Ko aki mariri ngke e bong?”* ba bon aia kantaningaia ba e na bae ni mate n te maitoroto. Ma e kakaekaki ao e tuangia ba e bon aki mariri ba iai temanna te aine ae rabunna n rabunana *“... te aine ae moan te tikiraai ae e kangai, Tai kakamakuri te teinnaine ae ko uarereke, ba e na bon roko kakaekaki.”*

N te bong are i muina ao e a karaoaki te Tutia ni katituaraoi i bukin maiuna. Ma ngke e a uotaki nako matan tamnein (statue) **Nei Maria - Our Lady of Mount Carmel** ao e a bon takarua naba nako

tinana ni kangai; *“Mama! Mama! Aio te aine are e rabunai n rabunana ngkoananoa!”*

N te rotongitong ao e bon aki kona n nora raoi kawaina ao e na bon baka n te katati ae e nano ao e kiri baa/atibu ngke arona ba E aki tei i rarikina tinana are moan te akoi ao n tuangnga ba e na aki kakamakuri.

Nei Maria n Guadalupe e a roko iaon ae abara ae Kiritimati

Maria Tokobea, Kiritimati Bariti

Ti a reita banara ma tinara ae Nei Maria n Guadalupe i aon Kiritimati ni kamauri ngkami tarira ao manera n ana tangira te Uea. E roko tinara ae Nei Maria mai Guada-

lupe tabeua te namakaina n nako ao e a kabutaki ngkai i nanon kawa nako. N te tai aio ao e a tia ni kitana Ronton ao n roko i Tabakea are e na manga kawari naba autina i main manga nakona nako Banana. E bon barongaki aron manganangana iroun ara tama ae te tama Kaitabo ao ni buokaki iroun Akorita Kanoua n reitaki ma katekiki ma kain aia makoro ao kain ara botaki n tataro aika te charismatic ao ai moara riki bon Ana tanga ni buaka Nei Maria.

E moan karaoaki te katiki man ana Etekuata te Aro i aon Ronton ao ni buti ni kawari makoro ni kabane ake aua i aon Ronton ni moa man te makoro ae Tetaobe ao n toki n Santo Tamiano n Molokai. E katikaki ni katoa karangaina (4.30 - 5.00 am) nakon taian makoro ma mwenga ake E na kawari. E tiku tenibong i nanon makoro nako i main ae e na manga butimaeaki nakon te makoro are i muina. N tikuna i nanon makoro ao a rin/kabane kain te makoro n aia maneaba ni kamaroroa tinaia. E karaoaki te butimaai ao te karaure naba ma ngaia n te botaki n amarake (wature) ni kukurei. E karaoaki naba te Tutia ni makoro ake a kawaraki n irianaki ma te Rotario ni katoa tairiki ao te katiki ni katoa karangaina i nanon te kawa ao n tiku ni motirawa teutana te tai n auti ake a tangira kawaraia iroun tinaia. E irianaki naba ma tamnein Nei Maria n Guadalupe are e kaka-barabara Akorita Kanoua ao a bati ake a roroko ni kan nora ao n ongongora te rongorongora ae moan te kakaongora aio.

E rangi ni katekenano naba noran tangiran tinara are e oti n aron te katauraoi ma te butimaai. Te katamaroa i nanon maneaba ma auti ake a na kawaraki iroun tinaia a bon bane aroia. E tiki te bwerei ae boou ma te katibu ma taian banner ake a koreaki iai taeka ni butimaai n aron *“Welcome Home”, “Pray for us...”* ao a bati riki. Iai naba taian raneanea ma tauran te kawai ma auti aika a karakara - color light, ake a kaotaa riki kawain tinara i nanon aiotan te karangaina. E bon rianako aron te katamaroa ao e bon rianon naba aron butimaeen te otaba n te karangaina! E karoko nano noran tangiran tinara irouia tarira ao manera are a kaotia n aia katauraoi ma aia butimaai ae e bon bane arona n reitaki ma nanoia n ingainga ni kariaria rokona. E bati te tang ni kukurei ao ni kakatonga n rokon tinara ao ti kakoaua ba E bon nikiri ana karatia aika a bati n ara makoro ao ni mwengara nako aika a kakaokoro. E aitara naba tikuna i rarikira ma ana rekenibong n 8th Tebetemba



*“E rangi ni katekenano
naba noran tangiran
tinara are e oti n aron te
katauraoi ma te
butimaai”*



ao are e a rungaki irouia kain Ana tanga Nei Maria ni maneaban Te Aro i Ronton. Kanoana bon te amarake ao te takakaro ni kukurei irouia kain ara botaki ake a roko man aia kawa aika a kakaokoro ao ni kairaki iroun Akorita Kanoua.

Ti rangi ni kakatonga n noran tangirakin ao karinean tinara irouia tarira ao manera n ara Ekaretia ma a bon rotaki riki nanora n aron te nano n reitaki ao ni karine-rine irouia tarira ao manera man Ekaretia ake tabeua. Iai ake a baka nanoia n noran te kakamakuri ma te katauraoui i main rokona ao a buoka naba aron te katauraoui ao a bubuti ba a kan kaonoaki naba n ana karatia tinara. Iai naba ake a bon katauraoui ao ni butimaia naba nako aan mwengaia ao iai ake a bon butimaeia naba n nanoia mai i aan aia auti i nanon uotakina riaan mwengaia ao i nanon tikuna n auti ake i rarikia.

Rokon tinara i rarikira e bon uota te kukurei ae bati, te nano n reitaki ao te nano ni kan tataro. Ti noria tarira ao manera ake a tia n aki irira te tutia n taai aika a nako ba a manga iriri ao e a rikirake naba maitia ake a ririanna ni kaea te katiki ni katoa karangaina ma te rotario ni katoa tairiki. I nanon naba tikun tinara n ara makoro nako ao ti bon namakina naba te rau ngkai bon akea te kiriwe ke te kabuanibai ae riki n taai aikanne.



E Kauringira ara Uea ae Iesu "ngkana ko kan irirai ao kakeako, tabeka am kaibangaki ao irai. Maura n kiritian e bon boto oina ni koaua ngkana ti kona ni kabureira ao ma n kakeaira "self sacrifice" ni katotonga Iesu ae ara Uea.

"Rokon tinara i rarikira e bon uota te kukurei ae bati, ..."

**Taekan te kuna nakon Lady of Guadalupe
Oteaki iroun Tautam latakée, NSC man St Columban,
Bikenibeu Parish**

Oin nanon ao ko kamanangaira
Inanoni Marawa
Ibuakon te buaka ma naomoron marawa
Ko kataua aei nakoira ba tina katoonga iai am tangira
Ibukin tina ae ngaia maten nanora

Ti mananga nakon te tabo ike ti bon riai n roko iai
Ba e na ota naba iai itoin te Evangkerio
Ai rabara ngkoe Iesu ni kororaoin am tangira
Akea te tang te mate ma bon ti nebonebo

Rokora I aon Tamana are ko kanakoira nako aona
Ti boo ma angibuakan baikorakin te maiu
Ai kawara tarira ake a titiku I aona
Nanoia ni kan nora Nei Maria mai Guadalupe

Tamara ae rine ma kai nana tiim ao ngaira natim aika mangori
Ti booti nanora ni kanga
"We praise you Lord for the love of our Lady of Guadalupe".

